



INTRODUCZIUN

DA MARIA CRISTINA DERUNGS-BARTOLOMEI

Quels plaids digl evangeli concludan la sentupada (discusa, da notg) de Nicodemus, in farisè e magistrat dils Gadius, cun Jesus che annunzia ad el la nova naschienscha da surengiu, dal Spert per astgar entrar el reginavel de Diu. Quei ei pusseivel pér cura ch'il Fegl vegn «alzaus si» tier il Bab silla crusch, ella levada ed ascensiun.

Sco castitg per lur rebellun el viadi tras il desiart, eran siarps tussegadas vegnidas tarmessas als Israelits. Mo sin camond de Diu fa Moses ina siarp d'ìrom ed aulza quella sin in pal. Tgi che mira sin la siarp d'ìrom miera buca dallas miersas. Era nus essan envidai d'alzar ils eglis da nies egoissem, reconuschend el crucifigau disfigurau il victur gloriu della mort e dil mal, il Fegl tarmess dalla carezia de Diu per spindrar il mund. Crer en el dat a nus access alla nova e perpetna veta. Quei pretenda d'exponer nossa veta alla glisch de Jesus e – sco ellas empermischuns dil Batten – refusar la stgiradetgna, pia refusar de dar suatienscha al mal.

EVANGELI

Gn 3,14–21

¹⁴Pertgei sco Moses ha alzau la siarp el desiart, aschia sto il Fegl dil carstgaun vegnir alzaus, ¹⁵sinaquei che scadin che crei hagi en el veta perpetna. ¹⁶Aschizun ha Dieus carezau il mund, ch'el ha dau vi siu unic Fegl, sinaquei che scadin che crei en el mondi buc a piarder, mobein hagi veta perpetna. ¹⁷Pertgei Dieus ha buca tarmess siu Fegl el mund, per ch'el trueschi il mund, mobein per ch'il mund vegni spindraus entras el. ¹⁸Tgi che crei en el, vegn buca truaus; tgi che crei buc, ei gia truaus, perquei ch'el ha buca cartiu el num digl unic Fegl da Diu. ¹⁹En quei consista il truament: La glisch ei vegnida el mund, mo ils carstgauns han carezau la stgiradetgna pli fetg che la glisch; pertgei lur ovras fuvan schliatas. ²⁰Scadin che fa dil mal, odiescha la glisch e vegn buc alla glisch, per che sias ovras vegnien buca scuvretgas. ²¹Mo quel che fa la verdad, vegn alla glisch, per ch'ei vegni paleis che sias ovras ein fatgas en Diu.